

# 大方廣普賢所說經

唐于闐三藏法師實叉難陀譯



南無本師釋迦牟尼佛

## 說明

本繁體校正版《大方廣普賢所說經》電子書，根據《乾隆大藏經》大乘華嚴部，第 0094 部，唐于闐三藏法師實叉難陀譯《大方廣普賢所說經》影印本校正，句讀僅供參考。

本電子書是免費結緣品，特此說明。

仁慧草堂

二〇一九年二月



掃碼關注仁慧草堂微信公眾號

## ●起誦儀

### 香讚

(一編)

爐香乍爇. 法界蒙薰. 諸佛海會悉遙聞. 隨處結  
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

### 淨口業真言

(三編)

唵. 修唎. 修唎. 摩訶修唎. 修修唎. 薩婆訶.

### 淨三業真言

(三編)

唵. 娑嚩. 娑嚩秫馱. 娑嚩達摩娑嚩. 娑嚩秫度憾.

### 安土地真言

(三編)

南無三滿多. 母馱喃. 唵. 度嚕度嚕. 地尾. 娑婆訶

### 普供養真言

(三編)

唵. 誚誚曩. 三婆嚩. 禡日囉斛.

南無本師釋迦牟尼佛（合掌三稱）

開經偈

（一編）

無上甚深微妙法 百千萬劫難遭遇  
我今見聞得受持 願解如來真實義

# 大方廣普賢所說經

唐于闐三藏法師實叉難陀譯<sup>1</sup>

如是我聞：

一時，佛在如來神力所持之處，與十不可說不可說百千億那由他佛刹微塵等菩薩摩訶薩俱，前後圍繞，而為說法，皆已成就普賢之行，普賢菩薩摩訶薩而為上首。

時眾會中，有十菩薩摩訶薩，各與十不可說不可說百千億那由他佛刹微塵等菩薩眷屬，從十方處，忽然出現，皆坐無礙莊嚴師子之座，其名曰普光藏菩薩、甚深藏菩薩、威德光明藏菩薩、雲音藏菩薩、金剛藏菩薩、普音不動威光藏菩薩、普名稱威光藏菩薩、山王不動威光藏菩薩、普現眾像威光藏菩薩、十力清淨威光藏菩薩。彼諸菩薩出現之時，於此會中，唯除普賢，其餘一切菩薩大眾，靡不傾動，所有威光亦盡不現。一一菩薩，皆雨十不可說不可說百千億那由他香雲、塗香雲、鬘雲、衣雲、寶蓋幢幡雲、清淨世界雲、眾寶樓閣雲、菩薩眾會道場雲、大光明網普照雲、

<sup>1</sup> 大正藏：唐于闐三藏實叉難陀譯

菩提道場莊嚴雲、如來形像袈裟雲，各興如是不可思議諸供養雲，充滿法界，供養如來。斯諸菩薩所坐之座，眾寶莊嚴，微妙清淨，於彼一一莊嚴事中，普現一切無量世界、無量眾生、無量諸佛、無量菩薩，又現不可說不可說過去、未來無量世界及彼諸佛，現坐道場，為化眾生，轉妙法輪，諸菩薩眾，供養如來，淨修一切波羅蜜行，常無斷絕。

爾時眾會，咸作是念：「此諸菩薩，從何世界諸佛所來？」即共請問普賢菩薩。

時，普賢菩薩普告一切菩薩眾言：「諸佛子，汝等各自推其來處。」

時，無礙眼菩薩則入普迅疾三昧、遍至三昧、明照法界三昧、具一切神通三昧、了一切境界三昧、現一切眾生身神通三昧、知一切佛刹三昧，入如是等十阿僧祇百千億那由他菩薩三昧，以三昧力自見其身悉詣十方一切世界，乃至一切微塵處中，而不能見彼諸菩薩所從來土及於如來修梵行處。其餘一切菩薩大眾，各各別入菩薩三昧，皆不能見，亦復如是。咸從定起，白普賢菩薩言：「我等各入十阿僧祇百千億那由他菩薩三昧，不能見彼諸菩薩所從來處。」

普賢菩薩復告之言：「彼所從來諸佛國土，甚深廣大，極難可見，汝等今可更共推求。」

時，諸菩薩一一復入十佛刹微塵等菩薩三昧，求亦不見，各以其事，重白普賢。

爾時，普賢菩薩從座而起，上昇虛空，右繞世尊無數匝已，即於空中，普觀眾會，作如是言：「諸佛子，汝觀佛身，無礙莊嚴，三世平等，法界諸刹，無不普入，十方所有一切世界、一切如來、一切菩薩、一切眾生、一切諸趣，靡不影現如來身中，隨諸眾生心之所樂，悉令開悟。汝等應住普境界眼、盡虛空界清淨慧眼、了一切境廣大智眼，又應普請十方一切諸佛護念，皆應一心，離一切處、一切依止、一切執著、一切諸有，觀如來身，應入十方<sup>2</sup>微細境界，於一境界，了達一切無盡境界，觀如來身。」

時，諸菩薩敬順其教，咸向如來，頭面作禮，一心瞻仰。忽見世尊毗盧遮那，雙足輪中有世界，名法界輪，其土有佛，名法界莊嚴王，住世說法；彼普光藏菩薩摩訶薩與十不可說不可說百千億那由他佛刹微塵等菩薩摩訶薩俱，從彼佛刹，來此會坐。於雙躡中，有世界名無礙藏，其土有佛

<sup>2</sup> 大正藏：力

名無礙淨光，住世說法；彼甚深藏菩薩摩訶薩與十不可說不可說百千億那由他佛刹微塵等菩薩摩訶薩俱，從彼佛刹，來此會坐。於雙膝中，有世界名真金藏，其土有佛名金藏王，住世說法；彼威德光明藏菩薩摩訶薩與十不可說不可說百千億那由他佛刹微塵等菩薩摩訶薩俱，從彼佛刹，來此會坐。於雙股中，有世界名一切寶莊嚴藏，其土有佛名眾妙光，住世說法；彼雲音藏菩薩摩訶薩與十不可說不可說百千億那由他佛刹微塵等菩薩摩訶薩俱，從彼佛刹，來此會坐。於其臍<sup>3</sup>中，有世界名毗盧遮那藏，其土有佛，名毗盧遮那威德莊嚴王，住世說法；彼金剛藏菩薩摩訶薩與十不可說不可說百千億那由他佛刹微塵等菩薩摩訶薩俱<sup>4</sup>，從彼佛刹，來此會坐。於其心中，有世界名勝光藏，其土有佛名妙相莊嚴藏，住世說法；彼普音不動威光藏菩薩摩訶薩與十不可說不可說百千億那由他佛刹微塵等菩薩摩訶薩俱，從彼佛刹，來此會坐。於兩肩中，有世界名金色，其土有佛名金色王，住世說法；彼普名稱威光藏菩薩摩訶薩與十不可說不可說百千億

<sup>3</sup> 大正藏：臍

<sup>4</sup> 大正藏：摩訶薩俱；永樂北藏及龍藏：摩訶薩

那由他佛刹微塵等菩薩摩訶薩俱，從彼佛刹，來此會坐。於其口中，有世界名妙寶莊嚴，其土有佛名無量光嚴王，住世說法；彼山王不動威光藏菩薩摩訶薩與十不可說不可說百千億那由他佛刹微塵等菩薩摩訶薩俱，從彼佛刹，來此會坐。於其眉間，有世界名法界無盡藏，其土有佛名三世無盡智，住世說法；彼普現眾像威光藏菩薩摩訶薩與十不可說不可說百千億那由他佛刹微塵等菩薩摩訶薩俱，從彼佛刹，來此會坐。其頭中<sup>5</sup>，有世界名覆持不散，其土有佛名寶花積，住世說法；彼十力清淨威光藏菩薩摩訶薩與十不可說不可說百千億那由他佛刹微塵等菩薩摩訶薩俱，從彼佛刹，來此會坐。

時，諸菩薩既見如是無盡世界如來道場菩薩眾會佛神變已，一一皆得法界藏三昧、等十佛刹微塵數諸大三昧、一切法地陀羅尼、等十佛刹微塵數諸陀羅尼、離垢藏般若波羅蜜、等十佛刹微塵數諸波羅蜜力電光、等十佛刹微塵數一切智電光。

時普賢菩薩，復告大眾：「諸佛子，此法唯是行普賢行，為善知識所攝受者，乃得聞見。是

<sup>5</sup> 大正藏：於其頭中；永樂北藏及龍藏：其頭中

故汝等，於此法門，作金剛心，增上意樂，護持讀誦，勿令忘失。」

說此法時，彼諸菩薩摩訶薩等，歡喜信受。

大方廣普賢所說經

## ● 結誦儀

### 補闕真言

(三編)

南無喝囉怛那. 哆囉夜耶. 佉囉佉囉. 俱住俱住.  
摩囉摩囉. 虎囉. 吽. 賀賀. 蘇怛那. 吽. 潑抹拏. 娑  
婆訶.

### 補闕圓滿真言

(三編)

唵. 呼嚧呼嚧. 社曳穆契. 莎訶

### 普回向真言

(三編)

唵. 娑麼囉. 娑麼囉. 弭麼曩. 薩嚩訶. 摩訶斫迦囉  
嚩吽

南無佛 南無法 南無僧 (合掌三稱)

南無本師釋迦牟尼佛 (合掌三稱)

南無普賢菩薩摩訶薩 (合掌三稱)

南無護法諸天菩薩 (合掌三稱)

## 禮佛發願文

(一編)

歸命十方調御師 演揚清淨微妙法  
三乘四果解脫僧 願賜慈悲哀攝受

但(某甲)自違真性，枉入迷流。隨生死以飄沉，逐色聲而貪染。十纏十使，積成有漏之因；六根六塵，妄作無邊之罪。迷淪苦海，深溺邪途。著我耽人，舉枉措直。累生業障，一切愆尤。仰三寶以慈悲，瀝一心而懺悔。

所願能仁拯拔，善友提攜。出煩惱之深源，到菩提之彼岸。此世福基命位，各願昌隆；來生智種靈苗，同希增秀。生逢中國，長遇明師。正信出家，童真入道。六根通利，三業純和。不染世緣，常修梵行。執持禁戒，塵業不侵。嚴護威儀，蝸飛無損。不逢八難，不缺四緣。般若智以現前，菩提心而不退。修習正法，了悟大乘。開六度之行門，越三祇之劫海。建法幢於處處，破疑網於重重。降伏眾魔，紹隆三寶。承事十方諸佛，無有疲勞。修學一切法門，悉皆通達。廣作福慧，普利塵沙。得六種之神通，圓一生之佛果。然後不捨法界，遍入塵勞。等觀音之慈心，行普

賢之願海。他方此界，逐類隨形。應現色身，演揚妙法。泥犁苦趣，餓鬼道中，或放大光明，或現諸神變，其有見我相，乃至聞我名，皆發菩提心，永出輪迴苦。火鑊冰河之地，變作香林；飲銅食鐵之徒，化生淨土。披毛戴角，負債含怨，盡罷辛酸，咸霑利樂。疾疫世而現為藥草，救療沉疴；饑饉時而化作稻粱，濟諸貧餒。但有利益，無不興崇。次期累世冤親，現存眷屬，出四生之汨沒，捨萬劫之愛纏。等與含生，齊成佛道。虛空有盡，我願無窮。情與無情，同圓種智。

## 迴向偈

(一編)

願以此功德	莊嚴佛淨土
上報四重恩	下濟三途苦
若有見聞者	悉發菩提心
盡此一報身	同生極樂國

## 三皈依

(一編)

自皈依佛，當願眾生，體解大道，發無上心；  
自皈依法，當願眾生，深入經藏，智慧如海；自  
皈依僧，當願眾生，統理大眾，一切無礙。和南  
聖眾。



此咒置經書中可滅誤跨之罪

南无护法韦驮尊天菩萨

